

靜

志

居

詩

話

靜志居詩話卷十四

秀水朱竹垞先生著

扶荔山房編輯

吳維嶽字峻伯孝豐人嘉靖戊戌進士除江陰知縣徵授刑部主事出爲山東提學副使擢右僉

都御史撫貴州有天目山齋歲編

峻伯如鉛刀土花不堪灑削然其五律頗具岑嘉州張  
司業風格句如關河春鴈少風雨暮鐘多細雨來因晚  
空山到已秋清飈涼帶葉零雨細沾沙亂水穿林響殘  
星綴嶺低翦藤舒栢樹芟草出瓜苗暮雨初收市秋江

青  
正長潮潮生風聽急江遠雨看無澗水斜牽後林烟遠  
出村沙頭飛燕子市上賣櫻桃鐘殘寒雨外雁沒遠烟  
中較之明卿子與輩故自勝之

歐大任字楨伯廣州順德人以歲貢選江都訓導  
遷廣州學正入爲國子監博士遷大理寺評事  
終南京戶部郎中有思元堂旅燕浮淮秣陵北  
轅南荔游梁西署輶中詔歸蘧園諸集

楨伯吟稟過多先後發雕年分地別不盡流傳嶺外歲  
丁酉吾鄉曹侍郎潔躬出領粵東左轄思輯嶺南詩選

屬予甄錄予從楨伯孫博士正式借足本正式請予持  
擇稍寬予束版載歸黠以朱墨後數載不知何人竊去  
深以爲憾邇年復理明人詩念之不能釋懷忽從戴生  
錡書屋見之言獲諸質庫中不禁狂喜因載爲施鉛錄  
古今詩三十首吟誦數過似不爲濫正式雖墓有宿草  
亦足慰於地下矣短歌行云樂樂自生人窮反本生世  
幾何倏忽已晚去者日疎來者日親水流同源木生同  
根父母兄弟豈伊異人况有旨酒云胡弗歡白日冉冉  
明膏繼夕調軫鼓絲樂我親戚春有催耕秋有促織歲

事方勤及此游息今日同堂明日異鄉聽我短歌心如  
之何

附錄朱用晦云楨伯樂府近太康古詩師鄴下歌行  
準嘉州間出青蓮語近體羽翼盛唐七言佳境頗類  
龍標

石星字拱辰東明人嘉靖己未進士除行人選吏  
科給事中坐言事杖爲民尋起原職升尙寶司  
少卿歷大理寺左右丞進少卿出爲南太僕卿  
擢左僉都御史協理院事進左副都御史轉兵

部左右侍郎升工部尚書加太子少保尋改戶  
部復加兵部削籍有東泉集

少保雖與弇州聲應氣求然風雅道遠弇州與陽曲王  
明甫齊進之續五子之列月旦如是初不爲千秋起見  
止任一時之愛憎而已同穆敬甫舟中云回首雲深薊  
北臺不緣五斗賦歸來江湖我適扁舟與廊廟君終濟  
世材寒色侵人鄉夢斷濤聲入夜錦帆開平生擊楫成  
何事起向燈前歌莫哀

黎民表字維敬從化人民衷弟嘉靖甲午舉人選

授內閣中書舍人出爲南京兵部員外終布政  
司參議有瑤石橐

瑤石詩讀之似質悶而實沉著堅韌元美所取續五子  
無媿大小雅材者僅此一人而已其在都下偕龍游童  
佩子鳴永嘉康從理裕卿江陰鄧欽文徵甫武陵陳思  
育仁甫新城沈淵子靜南昌楊汝允懋功靖江朱正初  
在明麻城邱齊雲汝謙盱眙李言恭惟寅無錫安紹芳  
茂卿蘭溪胡應麟元瑞壽州朱宗吉汝修凡一十三人  
爲西山之游縉紳韋布各參其半匪徒好事洵勝引也

李維楨字本寧京山人隆慶戊辰進士選庶吉士

歷南京禮部尙書有大泌山人集

本寧如官廚宿饌麕鹿肥麋雖踞脯具陳魚羹雜進無  
當于味南都三首云舊邦偏霸一隅雄帝命維新自不  
同再闢乾坤清朔漠雙懸日月啓鴻濛春開蒼震青陽  
後斗直黃旗紫蓋中率土王臣修職貢江流萬里亦朝  
東親提三尺渡江來宇宙東南帝業開不盡風雲生沛  
澤方升海日見蓬萊河山兩戒朝宗地草昧諸臣將相  
才高廟神靈時出王龍文五色正昭回旌旗劔佩擁椒



除省總戎衣革命初綠草不侵雕輦路紅雲常護紫宸  
居金銀宮闕三山外烟雨樓臺六代餘誰謂長江天作  
塹八荒今日共車書

附錄愚山云本寧洪裁艷詞援筆揮灑又能骯髒曲  
隨以屬厭求者之意其聲價騰涌而品格漸下

屠隆字長卿又字緯真鄞縣人萬歷丁丑進士除  
潁上知縣調青浦升禮部主事歷郎中有出拳  
白榆采真南游諸集

長卿才非不高而縱情奔放記云不知所以裁之者也

潞河晚泊云迴浦落帆盡長堤帶郭斜暮烟平吐樹春  
雨薄沉沙白艇藏漁市黃茆覆酒家一瓢雲水外不復  
問年華竹枝詞云木槿編笆土築墻田家住在水中央  
四月穿綿六月冷門前夜夜稻花香水仙愛種水仙花  
一灣江水廟門斜女冠夜送小姑出四野無人好月華  
渡黃河云野曠天陰日欲西北風吹雪雁行低黃河渡  
口行人少一路寒沙沒馬蹄

附錄愚山云長卿令青浦延接吳越名士青簾白舫  
縱浪溇浦間以仙令自許在郎署益放詩酒西寧宋

小侯少年好聲詩相得權甚兩家肆筵曲宴男女雜  
坐絕纓滅燭之語喧傳都下中白簡罷官壯年不自  
聊縱覽關塞尋遨遊吳越七閩間長篇短什信心矢  
口而出所傳由拳白榆采真南游諸集皆未嘗起草  
之筆自謂采真者十之三乞食者十之七蓋實錄也

胡應麟字元瑞更字明瑞蘭谿人萬歷丙子舉人  
有寓燕還越計偕巖栖卧游兩都蘭陰邯鄲華  
陽養疴婁江白榆湖上青霞等集合爲少室山

房藁

長律至百韻已爲繁富矣元美哭于鱗乃增益至一百  
二十元瑞哭元美則更倍之蓋感知已之深不禁長言  
之也詩藪一編專以羽翼卮言錢氏詎之太甚觀少室  
山房筆叢沉酣四部自不失爲讀書種子詎可因詩藪  
而槩斥之乎贈高深甫云最憶高常侍生平樂事饒千  
金求騅駢十院貯紅綃古蹟留三代新聲和六朝湖頭  
明月滿無夜不吹簫

附錄屠長卿云元瑞近體無音不亮無思不沉無骨  
不勁要其變化離合不盡出於于鱗也 陳卧子云

元瑞如中賈張肆不皆珍美却無物不有又如老樂  
工清濁輕重都傳弟子

王世懋字敬美太倉州人世貞弟嘉靖己未進士  
除南京禮部主事遷尙寶司丞出爲江西參議  
歷陝西福建提學副使升行太常寺少卿有奉  
常集

敬美才雖不逮詰躬習氣猶未陷溺逢友一絕云歸來  
雙鬢兩蕭然見畫猶能記昔年風雨一船曾泊處借人  
燈火草堂前

附錄愚山云敬美弱冠稱詩于鱗呼曰小美貽書元  
美云小美思火攻伯仁奈何不善備之其論詩獨推  
徐昌穀高子業二家以爲更千百年李何尙有廢興  
徐高必無絕響其微辭諷寄雅不欲奉歷下壇坫則  
於大美亦可知也

王錫爵字元馭太倉州人嘉靖壬戌賜進士第一  
累官少保兼太子太保吏部尙書建極殿大學  
士贈太傅諡文肅有集

元美標榜詩人於五子四十子外以其弟敬美及文肅

稱二友焉題成祖四駿圖錄其二龍駒云玉勒繡纏鬃  
天廐出真龍報恩苟得所寧論劔戟鋒是時元戎方首  
路霜毛血濺仍馳驚將軍抽矢前致詞願言不忘射鉤  
時飛兔云白溝昔合圍龍駕忽三易不成元武陣寧標  
飛兔跡鬚鬣漬血汗成珠此時七萃紛前驅卽今宛馬  
西來道試看茫茫白溝草

徐獻忠字伯臣松江華亭人嘉靖乙酉舉人知奉  
化縣及卒友人私諡曰貞憲先生有長谷集

長谷以作者自期持論謂詩人之作代出意匠以增前

人之能自哉言也其比六朝聲偶品唐詩原樂府皆有  
功後學惜其書不盛行詩亦冲澹無累句特少警拔耳  
孫宜字仲可華容人嘉靖戊子舉人有洞庭漁人

集

洞庭漁人胡氏詩藪稱其學杜然實源於大李故論詩  
絕句云我愛風流太白豪萬言珠玉在揮毫特其運筆  
癡重斯與謫仙人不類耳其於空同大復少谷太初迪  
功西原皆其所取法滔滔莽莽下筆不休亦楚產之傑  
出者秋日歌云秋風忽吹洞庭草萬壑千崖覺秋早江



邊白日迴波濤湖上蒼雲亂昏曉少年日月易搖落卽  
目繁華已枯槁人事天時合併催風塵何必長安道次  
章云秋風淅淅吹茆屋東流之水西日速地連南極北  
極雲葉落千山萬山木江上漁人罷釣歸臨風拋擲綠  
荷衣黃塵碧海真漂泊白石滄波誰是非同諸友遊郭  
曲云地勝因湖得堂幽對野開晚風吹笛起秋水抱城  
迴溪友畱魚去鄰翁送酒來爲言九日近引客試登臺  
十三夜月東謝子云今夕江樓月能添昨夜明苑雲寒  
自歛城角霽尤清露警花間鶴風微樹杪螢百壺高興

在端坐待君傾

黃省曾字勉之吳縣人嘉靖辛卯舉人有五岳山

人集

勉之詩品太庸沙礫盈前無金可揀當時從遊李何漫  
無師資之益反不若方山泂溪二賈人子尙有秀句可  
采也江南曲云旖旎綠楊樓儂傍秦淮住朝朝見潮生  
暮暮見潮去

附錄岳東伯云五岳遊覽之餘操觚靡倦翦剔綺繡  
咀嚼瓊英每篇輟筆粲然驚目

史元中號鹿泉鄆縣人嘉靖辛卯舉人魚臺知縣

有青蓮集

鹿泉知魚臺縣事值歲大侵盜賊起有簡瑞者爲盜魁善運稍馳馬出沒官道鹿泉以計縛之簡卧庭下瞠目曰吾左手持稍右短兵橫行千里間今爲書生掩取天也公笑曰汝輕書生邪卽起著短衣持其所用稍運之左右迴旋如舞匹練忽稍斷爲三擲示簡曰汝稍豈足用耶簡叩頭稱死罪乃繫之獄至冬月將論決簡求見公曰身亦山東男子不敢負公乞假十日一生別老母

公卽縱之去衆皆懼及期先一日簡就獄離魚臺三十里爲獨山大盜劉儀久嘯聚其中有衆數千開府曾公銑議進剿以公爲前鋒旣擇日陳兵禡祭舉公知獨山有謀者在軍乃命植一竿百步外公手挾矢誓曰某以書生任將兵若一舉滅賊當三矢中此竿時萬目齊注監司諸將俱色變公從容三發三中呼譟震地是日公卽察得謀者三人釋其縛賜以美酒食笑謂曰汝來觀吾射邪謀者股栗盡吐賊虛實及所入獨山徑道公立提兵襲其寨擒劉儀還曾公大喜方論薦公會曾公遷

制三邊尋爲相嵩所害赴市鹿泉歎曰事尙可爲邪卽  
日挂冠歸里時年四十二家居復四十年守令思一造  
見不可得老益貧惟賣文以自給云

劉成穆一名嘉壽字元倩又字文孫崇慶人嘉靖  
辛卯舉人有劉元倩集

孝廉過漢武帝陵詩云歲暮霜殘過漢都武皇陵墓舊  
荒蕪不將玉匣藏天馬猶使金燈照野狐賦客詞園清  
露盡仙翁丹竈白雲孤千年唯有秋風曲渭水長流啼  
夜烏楊用修見而甚愛之然按其字句尙欠帖妥故置

不錄

陳芹字子野系出交南國王永樂中避黎氏之亂  
來奔遂家南京中嘉靖甲午舉人六試禮部不  
第謁選知奉新縣調簡得寧鄉之官九十日謝  
病歸結青溪社有陳子野集

錢氏序金陵社集詩云海宇承平陪京佳麗仕宦者誇  
爲仙都游談者指爲樂土宏正之間顧華玉玉欽佩以  
文章立墀陳大聲徐子仁以詞曲擅場江山妍淑士女  
清華才俊歛集風流宏長嘉靖中年朱子价何元朗爲

寓公金在衡盛仲交爲地主皇甫子循黃淳父之流爲  
旅人相與授簡分題徵歌選勝秦淮一曲煙水競其風  
華桃葉諸姬梅柳滋其妍翠此金陵之初盛也萬歷初  
年陳寧鄉芹解組石城卜居笛步置驛邀賓復修青溪  
之社於是在衡仲交以舊老而蒞盟幼于百穀以勝流  
而至止厥後軒車紛遞唱和頻煩雖詞章未嫻大雅而  
盤游無已太康此金陵之再盛也其後二十餘年閩人  
曹學佺能始迴翔棘寺游宴冶城賓朋過從名勝延眺  
縉紳則臧晉叔陳德遠爲睂目布衣則吳非熊吳允兆

柳陳父盛太古爲領袖臺城懷古爰爲憑弔之篇新亭  
送客亦有傷離之作筆墨橫飛篇帙騰涌此金陵之極  
盛也戊子中秋余以銀鐏隙日采詩舊京得金陵社集  
詩一編蓋曹氏門客所撰集也嗟夫日中月滿物換星  
移舟壑夜趨飲獵旦改白門有烏無樹枝之可繞華表  
歸鶴悵城郭之併非撰文懷人吁其悲矣謂我何求亦  
無膏焉覽其文者謂淋漓盡致盛衰今昔之感具於是  
矣然錢氏攷之未得其詳青溪社集倡自隆慶辛未而  
非萬歷初年也朱秉器停雲小志云青溪自後湖分流



與秦淮合當桃葉淮清之間有邀笛步者晉王徽之邀桓伊吹笛處也陳明府芹卽其地爲閣焉俯瞰溪流頗有幽致歲辛未費參軍懋謙約余爲詩會其上於是地主則明府次則唐太學資賢姚典客澗胡民部世祥華廣文復初鍾參軍倬黃參軍喬棟周山人才甫盛貢士時泰任參軍夢榛先後游而未入會者則張太學獻翼金山人鸞黃山人孔昭梅文學鼎祚莫山人公遠王山人寅黃進士雲龍夏山人日瑚紀亳州振東陳將軍經翰汪山人顯節汪文學道貫道會沈太史懋學程文學

應魁周文學時復癸酉復爲續會則吳文學子玉魏廣  
文學禮莫貢士是龍邵太學應魁張文學文柱每月爲  
集遇景命題卽席分韻同心投分樂志忘形問事校評  
期臻雅道前會錄詩若干刻之命曰青溪社彙許石城  
先生敘其首續會錄詩若干吳瑞穀序之會余領渝郡  
符任參軍入興都彙遂散逸後方民部沉葉山人之芳  
入焉余馳書社中期稍收輯無何胡民部費參軍以註  
誤謫黃參軍以領郡行已方戶部亦因事出盛會不常  
良朋星散回首江東雲樹在望秦淮煙月黯爾銷魂因

記舊游畧次其姓氏篇什如左按此青溪社集之木末始備錢氏止觀曹氏門客撰本而未見秉器小志故也折欄會和周銀臺云新歲詩家集深更與未闌共憐今夜月仍似去年看社主歡投轄車徒怨折欄綵梅紅對酒忘却外邊寒秦淮煙月云秦淮烟暝水長流明月空懸萬古愁春去秋來風景別鳴箏夜夜酒家樓

附錄愚山云子野才情警敏醉墨寫竹枝欹斜盡致文徵仲戒門下士往南京慎勿畫竹彼中有人也少嘗夢入深山石梁跨道瀑布灑空洞中二老僧趺坐

周繞木闌以防虎後遊天台山洞宛如夢中木闌猶  
在問之士人云老僧化去久矣自是恍然省悟專精  
內典作和寒山子詩別業近新林浦是謝元暉題詩  
處又於桃葉淮清之間起邀笛閣延一時勝流結青  
溪社每月爲集遇景命題卽席分韻金陵文酒觴咏  
之席於斯爲盛相延五十年流風未艾承平盛事至  
今人豔稱之長年市兒猶能指點其處

薛欽字宣甫懷安人嘉靖甲午舉人太平儒學教

諭有東山集

薛君詩頗清越近於皆山樵者曹能始序徐惟和詩云  
闕自林膳部後百餘年而得鄭考功又數十年而得薛  
博士其推重若是雞鳴寺云古寺浮仙嶂層巖近帝家  
洞香流石乳僧午飯胡麻金剎盤飛鶴丹池聚浴鴉俄  
聞孤磬發蕭颯滿烟霞

郁蘭字文芳秀水人嘉靖甲午舉人官南京刑部

主事有比部橐

嘉靖倭亂胡總制宗憲有捍患功及被逮繫陽川時知  
績溪縣事力覆護之至以去就爭願上印綬始得免羅

繼可謂長者今鄉曲之士知其名者寡矣矧詩乎讀五代史云天地沉冥際山河戰伐中可憐長樂老只是愛三公

吳旦字而待南海人嘉靖丁酉舉人謁選爲知州

### 有蘭皋集

蘭皋南園後五先生之一也惜其集不傳秋夕城闌納涼云同遊冠蓋晚相招澤國山川正沈寥宮閣迴臨秦代壘女墻斜帶越江潮流螢草細風先動繞鵲枝長露易飄多少高樓人不寐碧天涼月夜吹簫

許邦才字殿卿歷城人嘉靖癸卯舉省試第一任

永寧知州遷德府長史有海右梁園二集

殿卿如銳頭年少騁獵平原耳後生風鼻頭出火長歌  
有云長卿慕人千載前何似與君俱少年子雲慕人千  
載後何似與君俱白首爽氣殊倫令張正言爲之不過  
此也王元美贈詩云是時歷下李攀龍往往道汝文章  
伯乃卮言評詩竟不之及又夷之四十子之列取舍似  
未公也寄懷元美云鴻雁驚秋海上還片雲孤月蘄門  
關如何昨夜西窗夢不道千山與萬山

葉春及字化甫歸善人嘉靖壬子舉人選授福清  
儒學教諭陞惠安知縣遷興國知州轉鄖陽同  
知召爲戶部郎中有綱齋集

歐陽永叔日本刀歌云徐福行時書未焚逸書百篇今  
尙存令嚴不許傳中國舉世無人識古文永叔雖有是  
言亦詩人托興而已故葉少蘊馬翔仲均疑之鄭麟趾  
高麗史宣宗八年五月李資義還自宋奏云帝聞吾國  
書籍多好本命館伴書所求書目錄授之且曰雖有卷  
第不足者亦須傳寫附來目錄首開百篇尙書而高麗



未之有也先是咸平中日本僧喬然以鄭康成注孝經來獻不言有尙書王惲中堂事紀載中統二年高麗世子禰來朝宴於中書省問曰傳聞汝邦有古文尙書答曰與中國書不殊然則百篇尙書高麗且無之况日本乎萬歷初綱齋在郎署有命遣使臣封倭綱齋上言請多方索之以歸未免近於迂矣綱齋令惠安幾與姑臧萊蕪比潔有繡衣按郡經縣治騎從過盛將止宿焉綱齋前曰日未盱惠安小縣豈容駐節乎強之去強項甚矣及解組歸隱居羅浮之石洞吟詠自適雖以講學聞

詩宗杜陵不墮程邵門戶飲陳巽卿宅卽席賦得帝字  
云黃公避秦皇子陵傲漢帝萬乘彼不榮五斗吾何利  
邇來脫桎梏麴蘖聊避世田父尙不辭况乃夙同志高  
堂做華筵上客縱橫至日暮飲未休舍坐還席地屢舞  
倩人扶權言答賓戲因思劉參軍荷鍤有深意

劉魁字煥吾泰和人由舉人選授寶慶通判移知  
鈞州遷潮州府同知入爲工部員外郎諫徙雷  
壇廷杖繫詔獄者再以宮禁火赦還有請川集

永陵好道詔徙雷壇於禁中曰雷霆洪應之殿有壇有

城有轟雷軒有嘯風噓雪靈雨耀電之室有清一齋有  
寶淵門有靈安精馨輔國演妙之堂有八聖居有馭仙  
次各懸以額又別建凝道雷軒帝晝日常御之其始作  
也騎川疏請停止帝怒予杖繫獄與楊伯修周願之請  
學囹圄中是年八月西苑神降于乩請宥三臣乃得釋  
俄復逮繫明年宮禁火放還晴川陽明弟子也鄙人鄉  
公元標合三人詩刊之題曰三忠文選煥吾過德州次  
訥溪韻寄斛山云纔過滄州又德州綠楊堤畔菊花秋  
未論秦楚萬餘里且共風波一葉舟農圃漁樵俱是侶

江湖廊廟敢忘憂，獨憐腰脚差還健。有約同登華岳遊。  
周錫字子純太倉人嘉靖中以薦授潮州府通判  
有南游東山蕪葭得已諸集

子純下筆不休，間有合作。相傳攝潮陽縣印，巨寇楊三  
搃林大帥率黨千人，駕三十艘，歷境警報踵至。子純徐  
曰：鼠輩爾，胡能爲衆？皆懼。子純挾弓矢上馬，引滿射三  
發，三中的，桴鼓應之，擊走三搃擒大帥，以歸。縣境以寧。  
洵豪士也。吳門夜泊云：谷口揚帆風正急，野亭雲木雨  
霏霏。晚來城郭維舟穩，老去湖山見面稀。十里烟光開

疊嶂兩崖樓閣帶斜暉夜深欲傍寒山寺依舊鐘聲落  
翠微

吳承恩字汝忠淮安山陽人長興縣丞有射陽先  
生存橐

汝忠論詩謂近時學者徒欲謝朝華之已披而不知漱  
六藝之芳潤縱詩溢縹囊難矣故其所作習氣悉除一  
時殆鮮其匹楊柳青云村旗誇酒蓮花白津鼓開帆楊  
柳青壯歲驚心頻客路故鄉回首幾長亭春深水漲嘉  
魚味海近風多健鶴翎誰向高樓橫玉笛落梅愁絕醉

中聽

周沛字允大紹興山陰人有浮峰集

周氏宗譜不言允大登仕籍而徐文長集有哀周鄭州  
沛二詩允大別顧孝常云馬離鳴故羣人去懷心知憶  
昔邁君始意氣如連枝如何倏離別旦夕殊歡悲滔滔  
斯世士孰與吾心期言念古之人同心不同時同時復  
睽隔何用同時爲

邱雲霄字凌漢崇安人嘉靖十七年貢士選南京  
國子典簿遷柳城知縣有止山齋集

止山騷鸞作吏解組歸田栖息武卮山中閉關講學嘗  
與其友夜宿高明樓中夜有怪倚門作人語曰同遊不  
樂乎何卧之早也止山應之曰我載晨而遊抱日而歌  
汝胡不吾和而同其樂何爲昏暮而來也怪應曰不能  
止山曰吾亦不能怪歎息而去可謂不惑不懼者已松  
陽徐夢陽評其詩稱其雅澹勁古景真情得要之不蹈  
襲前人異乎七子之派者也江晚一律云帆勢迎風疾  
灘聲入暮誼漁燈出疎樹客路問前村野鶴冲烟迴山  
花帶雨昏寒光何處宿幽思未堪論

施漸字子羽無錫人歲貢生授海鹽縣丞有武陵

集

子羽僅初舜咨與華子潛酬和時號錫山四友三君皆  
非華敵子羽差優贈吳還云山人爲客吳門久白髮蒙  
茸將被首興到青山不問家笑來花肆常沽酒行路蕭  
然滿篋詩風流文采雅堪師自言身是陶宏景說與世  
人誰得知

李奎字伯文錢塘人以布政司吏再考錦衣從事

有珠山集



伯文周旋沈青崖於獄中者以氣義聞詩特寄與也採  
藥云山中宿雨過嶺上明霞赤荷鋤入南畦藥苗始堪  
摘黃精種未鋤紫芝已盈尺隔水望茅茨還歸煮白石

萬表字民望鄞縣人正德末中武進士累官都督  
同知僉書南京中軍都督府晚號鹿園居士有

### 玩鹿亭橐

鹿園裘帶翩翩志存開濟好從方外遊間與羅達夫唐  
應德諸公講性天之學值倭寇爲患守土者力不能支  
公遠結少林寺僧傳格鬪之法倭猝犯赭山公使釋孤

舟統其徒二百人薄倭營縱火前擊敗之俄太倉來乞  
師公別募月空等十八僧選經師天員爲將戰於翁家  
港諸僧衣錦袈裟持杖口含澱藍遇賊以藍塗面自地  
躍起若傑鬼前搏倭大驚以爲神遂大敗倭追及嘉興  
之白沙灘盡殲焉後遷官留都道出蘇州卒遇寇揚涇  
橋孤軍與戰得出身中流矢以書報家人曰家世死戰  
唯吾持文墨論議未嘗身將兵今晚年增一箭瘢可無  
憾矣蓋萬氏自武略將軍斌戰死阿魯完河子指揮僉  
事鍾與靖難兵戰死花園孫明威將軍武從征交趾師

次檀舍江陷陣死武弟文襲兄爵守桃渚有龍夜戲潮  
浮水面遙望兩炬光以爲賊火引強弩射之應弦落其  
一炬不知爲龍目也龍負痛騰蹠文船漂沒人稱射龍  
將軍三世不得裹骨歸葬故鹿園書云然鹿園子達甫  
仲章鎮國將軍孫邦孚汝永都督僉事皆材兼文武達  
甫有皆非集邦孚有一枝軒橐趙江心寺云清聲龍聽  
法空階月送潮此仲章警句也

按鹿園憫黎吟三首自序云參政平岷錢公出憫黎  
諸詠見不惻然傷懷因而有作詩云地何產柶與速

民何畜豕與犢豕犢盈盤吏反嗔村速窮年采不足

刻箭為約安得銷黎人借錢無約刻箭記之歲歲生當剗吾肉負

戈因拚一命償嗟嗟黎人誰爾牧虎兇來猶可奔狼

師一來人無存大征征縱殺玉石焚昔人鵬勦只一村

鵬勦功成賞不厚大征磨子還磨孫殺一不辜尙勿

為何况萬骨多冤魂鑿而飲哂而食撫黎何事來相

逼舊設有撫黎老人瘠牛可哂豈不惜薑水那堪吞滿臆撫黎

逼黎人之財則遙明鐙火忽驚疑一望旌旗我心惻

以薑水灌之撫黎至黎則明鏡揚旗以往羣黎草木豈有知貪吏腹削無休息

攻掠犯順誰所爲撫黎毒黎還毒國

劉銳字蓄之海鹽人世襲海寧衛指揮使有春臺

集

海村少補諸生屢試不利乃食世祿里居賑飢散藥以  
厚德聞有僕名木善射一日水鶴集資聖寺鳴吻木射  
之貫其左翮鶴帶矢盤旋良久竟集中庭如臆訴者海  
村曰嘻必木也命拔其矢縱之不能飛乃命木飼之旬  
日創愈向主人鳴舞翺翔而去海鹽人至今能道之

余承恩青神人官永寧參將有鶴池詩集

鶴池爲太保肅敏公孫肅敏有社稷功世襲錦衣衛指揮其子忤權倖調外衛故鶴池終身不得侍禁籙詩集八卷銅梁張肖甫序之答草池約汎蓉溪云春來花鳥總關情夜雨愁聽不到明怪殺主人猶病酒晴江鼓柁放舟行

戚繼光字元敬登州人世襲衛千戶以參將備倭浙東大破倭於台州以副總兵鎮福建大破倭於平海衛閩寇旣平以都督同知召理戎政出爲薊鎮總兵進左都督加少保卒諡武毅有止

止堂集

少保平倭之功戰勝攻克撰有紀効新書在薊日與總  
制譚公綸樽俎折衝撰有練兵實紀論者比之孫吳韓  
白焉軍中有暇輒與文士接席賦詩集名止止稟曰愚  
愚君曰夢夢是亦好奇矣盤山絕頂云霜角一聲草木  
哀雲頭對起石門開朔風鹵酒不成醉落葉歸鴉無數  
來但使雕戈銷殺氣未妨白髮老邊才勒名峰上吾誰  
與故李將軍舞劍臺度梅嶺云溪流百折遶青山短髮  
秋風夕照間身入玉門猶是夢復從天末出梅關

附錄愚山云少保結髮從戎間關百戰綏靖閩浙功  
在東南生平方畧欲自見於西北者十未展其三故  
其詩多感激悲壯抑塞憤張之詞君子讀而悲其志  
焉

張元凱字左虞吳縣人蘇州衛指揮有伐檀集

左虞西苑宮詞高出元美之上元美比於沈慶之曹景  
宗仍以武夫遇之未爲知己也宮詞云肅將上帝祀明  
堂寶鼎昭回日月光九獻不須歌舊曲詞臣昨已撰芝  
房秋殿清齋正受釐迎和門外立諸姬大官不進麒麟



脯御饌惟供五色芝陳詞瘞玉奏鈞天西苑宮牆近籍  
田水旱恐煩祠后土未央深處好祈年夕烽千里照甘  
泉一紙降魔勅已傳急遣六丁乘羽駕火輪金甲淨幽  
燕靈藥金盃百和珍仙家玉液字長春朱衣擎出高元  
殿先賜分宜白髮臣通天臺上接三台景命重臨清醮  
開拜舞不同郊社禮科儀一一聖人裁香通紫氣靄晴  
空靈貺神休集聖躬垂拱萬年如一日禮臣何必議青  
宮金符寶笈護雲英鸞鶴銜將入上清拜受玉霄龍鳳  
簡元陽象一字分明蓬萊方丈可梯航勾漏丹砂近寄

將昨貯銀山高幾許試將玉尺殿中量瑞氣祥雲薄海濱遠藩齊獻百千春進來白鹿高於馬馴擾金階不畏人

附錄王元美云將軍詩格務躋武德貞觀其語寧有瑕璧而無完砥砭汰陳而使之新非有沉深剌刺之思未易致也 愚山云左虞以督漕達燕薊覽觀宮闕苑囿親見齋宮醮壇之盛作西苑詩竊比諷諫之義王長公序其詩以沈始興曹竟陵爲比左虞夷然不屑也左虞沒長公伏日曝書得其行卷歎其知之

未盡爲詩一章屬其子孟孺酌而焚之殯宮

陳鶴字鴻野紹興山陰人世襲百戶有海樵集

海樵家居怪山之麓金庭閣老其女夫也山上有息柯亭傳是閣老所建而海樵集中酬周山陰張會稽攜酒見訪之作中云相攜直上息柯亭恐是海樵故宅中物矣五言如近海潮通郡連山瘴入樓山川畱別夜風雪望鄉人孤月長隨棹寒潮自到門繞廬松葉暗穿竹水聲齊明月幾家好故人今夜俱七言如牀下鳴蛩偏入夜風前白苧不宜秋風塵會面猶難卜世事傷心只自

知細雨殘燈岐路酒清江紅葉寺門舟薄游兩見雁歸  
塞多病却憎花滿樓高士遠栖滄海曲好山多近永嘉  
場山深倦鵲猶依樹風定飛螢忽上樓比於田水月雖  
才鋒不及而鑄詞差醇

附錄錢去病云海樵七古流麗似李頎七絕爽朗似  
王昌齡題畫贈姜明府云暮雲春樹路千重雪後看  
山到處同夜永燈寒無過客月明江色滿樓中送張  
伯淳還關中云憐君獨棹渡黃河西北山川入雍多  
料得到家春未至馬蹄半在雪中過吹笛懷友云玉

笛橫吹入夜分中天華月度流雲蒼川兩畔春風起  
飛盡梅花不見君池上聽陳老琵琶云夜深池上弄  
琵琶萬里銀河月在沙莫向尊前彈出塞只今邊將  
未還家

陳第字季立號一齋連江人初爲學官弟子俞都  
督大猷召至幕下教以兵法起家京營出守古  
北歷遊擊將軍有寄心集五岳兩粵游草

一齋投筆從軍受知於譚襄毅俞武襄戚武毅三公江  
陵既沒論者謂武毅不宜於北徙之嶺南一齋作塞外

燒荒行有云年年至後罷防賊出塞燒荒灤水北枯根  
朽草縱火焚來春突騎飢無食又云隆慶二載譚鼎來  
文武調和費心力從前弊政頓掃除臺城兵器重修飭  
迄今一十五年間閭閻雞犬獲寧息譚今已死戚復南  
邊境危疑慮叵測患難易共安樂難念之壯士摧顏色  
論者不引今昔觀紛紛搜臆臣滋惑又送戚都護絕句  
云轅門遺愛滿幽燕不見烽烟十六年誰把旌麾移嶺  
表黃童白叟哭天邊誦其詩扼腕於封疆之事深矣一  
齋儲書最富余嘗游閩臨發林秀才侗持其後人所輯

世善堂書目求售燈下閱之見唐五代遺書琳琅滿目如披靈威唐述之藏多平生所未見不覺狂喜秀才許至連江代購逾年得報書則已散佚徒有惋惜而已

附錄愚山云季立不得志繼俞戚之後登壇爲名將拂袖歸里尋聞焦狀元弱侯老而好學裹糧白門離經析疑扣擊累年卒爲名儒論兵論文皆鑿鑿有根據

李言恭字惟寅岐陽武靖王裔孫襲封臨淮侯環衛侍直留守陪京加太保有青蓮閣貝葉齋游

燕諸集

李惟寅詩如四姓小侯僑門列席雍容韋帶哱咤彭巖之氣都盡

又云京師顯靈宮在宮城之西長陵建以祀王靈官者也靈官藤像長陵每載之軍中有禱輒驗及金河川昇不可動宣德初拓其祠額曰大德顯靈宮復建東西二閣嘉靖三年營龍虎殿以奉元武焉閣中留題者衆以惟寅爲擅場其詩云先帝祈靈太乙祠重來空憶翠華旗殿中香火儀猶具海上仙人事轉疑客與方書閒指



畫老來詩律舊心思調高身健慚時輩高閣憑闌眼故  
遲所云海上仙人者相傳藤像獲之東海中也

附錄愚山云惟寅詩風氣婉弱時有韻致如夢回芳  
草遠人去落花多藝苑至今傳之

呂時臣字中甫鄞縣人有甫東山人集

中甫以避仇客歷下與李中麓楊夢山切劘酬和旣轉  
客青州衡莊王邸起高樓東向眺遠樓成王於望後四  
日置酒召客時日景旣盡疎星尙微王未肅客坐憑闌  
語笑已而月上王歡甚因命曰待月樓請客賦詩中甫

詩云川原夕氣交暝色自相向月猶藏海底人已坐樓  
上王賞擊謂得待字義手觴奉之俾居客右晚客濟宣  
王所客死河南中甫年六十治生壙於句章之夕陽里  
自撰墓銘後十年乃卒歸櫬葬焉詩品在中麓夢山之  
間同時曳裾王門者多遜之襄陽蹋銅蹄云青蒲沒漢  
水白馬渡襄陽男兒但得意何處非故鄉山中吟云桃  
源渺何許武陵萬仞山緬想秦時人生死桃花間邇來  
逾千載會無幾人間桃樹摧爲薪桃源平作田雞犬入  
租稅焉可住神仙

鄭若庸字中伯崑山人有蛸蛸集

中伯曳裾王門妙擅樂府嘗填玉玦詞以訕院妓一時  
白門楊柳少年無繫馬者羣伎患之乃醵金數百行薛  
生近充作繡襦記以雪之秦淮花月頓復舊觀承平勝  
事雖小堪傳今之秋兔寒鷗想像昔年之酒旗歌扇良  
足豔也秋涉詩云蒼山崔巍照秋渚紅樹離離夕陽渡  
行人涉水更看山馬足凌兢來復去雲際人家望欲迷  
松關蘿徑隔烟扉山僧卧穩西巖寺時有鐘聲落翠微  
尤嘉字子嘉嘉興人有西陵集

子嘉亦趙康王客穆敬甫錄其詩以比謝四溟句如偶  
因看竹來僧院不爲求魚坐釣磯頗有自適之趣康王  
賓客無多而吾里有二其一則仲舍人春龍也

徐渭字文清更字文長山陰人有櫻桃館集

文長詩原本長吉間雜宋元流派所謂斐然成章不知  
所以裁之者其自評云吾書第一詩二文三畫四然詩  
文未免繁蕪不若畫品小塗大抹俱高古也

又云陰風吹火篇美錢工部能憫國殤召僧施食而作  
其辭云陰風吹火火欲然老梟夜嘯白晝眠山頭月出

狐狸去竹徑歸來天未曙黑松密處秋螢雨煙裏聞聲  
辨鄉語有身無首知是誰寒風莫射刀傷處高旛影卧  
西陵渡幡底颯然人髮豎髑髏避月攬殘黍中流燈火  
青熒熒饑魂未食陰風鳴莫言墮地永爲厲宰官功德  
不可議首八句句句警策具體長吉而得其骨髓者也  
以下擘緩拖沓去嘔心人遠矣稍爲芟易存之結語尤  
索然無味文長有贈柳元穀以所得晉太康間冢中杯  
及瓦券來易余手繪五古云遙思冢中人有杯不能飲  
孤此黃兔窠伴千三百稔券鏹四百萬買地作衾枕想

富不死時用物必宏甚尊曩羅寶玉裹祿賤繡錦豈有  
織纖指捧此鍛泥蕈存亡隔一邱華寂迴千仞活鼠勝  
死王斯言豈不審

附錄袁中郎云文長詩有一段不可磨滅之氣如嗔  
如笑如寡婦之夜哭羈人之寒起當其放意平疇千  
里偶爾幽峭便是鬼語荒墳 陳卧子云文長亦有  
正音 李舒章云文長詩材粗黠雅人所少然其一  
往有雋處如部曲少將新跨紫驪

沈明臣字嘉則鄞縣人有豐對樓集

嘉則文長同在胡少保宗憲幕府並受少保知遇督府  
周防嚴密文長恒戴敝烏巾衣白布澣衣非時闖入或  
出昵飲夜深猶開戟戶以待嘉則嶽嶽不阿少保遙望  
見必起立嘗讌將士於爛柯山酒酣樂作嘉則於席上  
賦凱歌十章吟至狹巷短兵相接處殺人如草不聞聲  
少保起捋其鬚曰何物沈郎雄快乃爾命刻石置山上  
及少保死請室中嘉則走哭墓下持所爲誄遍爲訟寃  
比於文長懼禍發狂者相越矣嘉隆間士大夫以篇什  
相高最繁富者莫若弇州於時吳明卿之甌瓚洞注伯

王之太函李本寧之大泌山房諸集以及劉子威馮元  
成余仲房屠緯真之徒糟邱肉林愈多愈穢下及布衣  
如王承父王伯穀輩咸以多相尙嘉則先後積詩七千  
餘夫安得精然絜之承父則雖饒腐菌間有神芝卽屬  
焚芻不無嘉蕙非若諸君之叢筍荒茅紛然彌望也

王寅字仲房一字亮卿歙縣人有十岳山人集

仲房少走大梁問詩於獻吉不遇遂從少林僧習兵杖  
海上用兵依胡尙書督府尙書不能用竟以敗晚緝鄉  
人之詩曰新都秀運集其持論頗偏與岳東伯今兩瑤



華相類吳山秋晚云有客閒居無奈閒爲看秋色一躋  
攀古盤細草斜陽路三曲澄江隔岼山野寺最宜紅葉  
後孤鐘偏在白雲間賞心又得逢僧話此後幽期數往  
還

康從理字裕卿永嘉人有二雁山人集

裕卿任俠談兵間關戎幕劉將軍子高建纛毘陵病革  
裕卿馳赴與訣經紀其喪扶其柩至武林遠近皆義之  
居燕偕黎惟敬輩游西山其倡和詩僅存餘多散佚太  
倉曹子念收而刻之同王必漸言懷云江頭木落雁初

飛客子傷心賦授衣鄉夢不緣千里隔浪遊空說半生  
非雲山是處堪招隱塵海何年可息機漫向天涯愁極  
目幽懷已負北山薇懷顧太學云登樓風雨暮蕭蕭久  
客離魂黯欲消楚樹吳雲春寂寞塞鴻江燕歲迢遙新  
愁芳草天涯路舊事梅花月下簫今日分飛悲萬里憑  
闌搔首思無聊

王翹字叔楚蘇州嘉定人嘉靖中倭亂嘗居幕府  
贊軍事有小竹集

叔楚工畫竹子嘗觀其真蹟爲賦長歌不知其幕府才

雄也邑人侯大年述其繪草蟲更精惜未得見小竹集  
一冊中間贈酬諸將之作居多客夜云山月漸高低燭  
光有客逗邇衣滿霜淒淒獨夜還自語茫茫一水遙相  
望黃花勸酒酒不醉白石放歌歌轉長弧矢天涯男子  
事錯將岐路卜行藏

陳淳字道復後以字行別字復甫長洲人國子監  
生有白陽集

白陽寫生全學石田詩亦倣之特少神解耳聞烏云重  
重烟樹鎖招提野客來尋路不迷纔過板橋塵土隔落

花無數鳥爭啼

附錄錢功甫云先生詩瀟散閒雅恬澹自然如梧桐  
半階月楊柳一簾風流水去無住停雲意自閑晚涼  
生竹塢新水溢花渠咸臻妙境

彭年字孔嘉長洲人有隆池山樵集

孔嘉人品足亞徵仲何穉孝長歌云隆池處士彭孔嘉  
徵仲並軌吳人誇特詩不及

陸治字叔平吳縣人歲貢生有包山遺詩

叔平遊道復之門當時鄉曲之論謂詩得其興畫得其

趣然叔平畫以工緻勝詩則與道復同流治平寺納涼  
云竹根雨過石苔斑鐘梵蕭然晝掩關坐愛微涼生碧  
殿忽看飛雨失青山雲分暝色來天外風卷潮聲落樹  
間最是晚晴宜眺聽夕陽橫抹蓼花灣

錢穀字叔寶長洲人有懸磬室詩

叔寶貧無典籍遊文徵仲之門日取插架書讀之以其  
餘力點染水墨超入逸品晚葺敝廬題曰懸磬室王元  
美爲賦詩所云空梁頗受落月色北窗靜俟涼風眠者  
是也手抄異書最多至老不倦做鄭虎臣吳都文粹緝

成績編聞有三百卷其子功甫繼之吳中文獻藉以不  
墜與公瑕伯穀奔走相門者遠矣

居節字士貞吳縣人有牧豕集

商谷繩削斤斤不失晚唐家數雨後一律云綠嶼青林  
白練溪草深市井路全迷雲將片雨歸何急麥釀輕寒  
秀欲齊一水遙連蕭寺外千山不斷石橋西欲營三徑  
添松菊立盡殘陽見鳥栖

周詩字以言崑山人有虛巖集

虛巖頻與皇甫昆弟酬和故派亦近之其言云詩之淵

妙近體難工而鮮叛選體易似而實離倩衣毛嬙借飾  
西子始勞髣髴終露本來作者既非匠心覽者又皆庸  
目乃曰甲幾魏晉乙庶齊梁是何古人之多也斯言可  
鍼卮言詩藪之膏肓

沈仕字子登杭州人刑部侍郎銳子自號青門山  
人

附錄岳東伯云青門身本貴介志則清真野服山中  
江遊海覽新篇雅調遠邇齊稱翰墨丹青兼能游藝  
信乎野鶴之在雞羣祥麟之遊郊外村居春日云柳

堰迷丹日蓬屏啓綠烟人閒啼鳥外興劇落花前野  
色連三徑山光滿四筵鷓鴣如可解堪作酒家錢

陳體文字仲約號寄委江陰學生有友錄彙

仲約早辭學官肆志詩律築耕舍於郊西有田數十畝  
力耕而食賓至必治酒酒酣賦詩詩有云得魚便覓酒  
有酒且畱人如此卽爲樂何須復苦貧無魚亦無酒宜  
主不宜賓如此卽高卧何愁不及晨可謂達生之士矣  
平居詩不畱草其友花左室見輒手錄之故名友錄彙  
五言不爲舊格所拘頗自超脫是時五岳十岳諸山人



率以草布效縉紳語未免可憎菰蘆中有此人大是不  
俗雜詩三首云林間慈鳥鳥哺母聲嗚嗚城上雙鴟梟  
破巢還啄雛鞬鷹飽食肉勁翻翻平蕪不擊城上鴟但  
擊林間鳥漢家有通儒窮經三十年腰下鮮尺組囊中  
無一錢出門逢高車呵者當其前問之彼爲誰牧兒新  
助邊明鏡不在遠粧臺當目前只言他人媿長謂自己  
妍人亦不能別鏡亦不能宣遂使效顰子翻希惑者憐  
寔起云老覺春無賴朝來起長情鳥聲殘夢裏花氣宿  
醒中樓日連城下池風過苑通却悲寒食節歲歲空江

東

王襍字宗順泰州安豐場人處士良仲子自號天

南逸叟有東崖遺集

東崖隨父心齋之會稽傳陽明良知之學吳興沈桐贈  
之詩云念子賢者後至理早已融譬彼三世醫指授寧  
無從詩其餘事然如一室風過雨三更月到窗好雨應  
宜早秋花不恨遲坐雨新亭曉聞潮落月時老攜杖屨  
歸山谷閒看兒孫種水田亦有活脫之趣

岳岱字東伯蘇州衛人有漳餘子集

東伯集交友詩爲今兩瑤華猶存次山篋中遺意征南  
一律云安南易姓舊相因封賜還應到海濱萬里版圖  
曾郡邑殊方小醜亦君臣炎風毒霧煩諸將翠羽明珠  
入紫宸想見乞降矜面縛天威此日轉陽春

方學漸字達卿桐城人貢生有連理堂集

方氏門才之盛甲於皖口明善先生實濬其源東南學  
者推爲職志焉如東征句云豈謂憑陵愁日本至勃師  
旅出中原宛然空同華野遺響

陳鳳字羽伯更字鳴岐無錫人有石郵橐

明詩人同姓名者甚夥然猶世代相去字里未同至金陵陳鳳字羽伯梁谿陳鳳亦字羽伯兩君詩皆平平旣無春城寒食之作可別韓翃始猶兩存終愁兩湮沒耳雨中客至云新水柴門漲碧沙孤邨烟樹隱漁家客來湖上偏逢雨春到江南又見花沽酒隔鄰傳小甕打魚深夜出枯槎浮生莫遣浮名誤醉裏還驚兩鬢華

吳擴字子充崑山人有長吟閣稟貞素堂集

子充游大人以成名嘗於元旦賦詩懷分宜閣老其友聞之笑曰歷頭第一日懷中朝第一品官循是懷人卽

歲除亦輪不到吾輩此可入啓顏錄嘉靖間山人若呂  
中甫謝茂秦之徒排難報恩不無可取若子充所謂斗  
筲之人無足算也

邵正己字格之休寧人有元石山房草

格之專精墨務詩亦斐然題銅雀臺云寂寂銅雀望飄  
飄總帳懸君王遺令日是妾斷腸年舞影傷羅綺歌聲  
咽管絃西陵松檟冷日夕鎖寒煙

郭第字次甫丹徒人隱於焦山嘗爲嵩岱游有廣

篇

附錄何元朗云次甫江月不可畱山雲坐相失之句  
駸駸窺盛唐之室

邊習字仲學歷城人尙書貢仲子有睡足軒詩集  
附錄王貽上云宏正四傑惟何氏之後最大李氏次  
之徐氏有子伯虬稱詩吳中名載今雨瑤華而仲學  
以尙書之胄食貧授徒有遺橐一卷薄暑不成雨夕  
陽開晚晴其佳句也

陸光宙字與嘗平湖人有鉏餘橐

與嘗隱居郊園與宗旭初暘璩之璞君瑕輩一十八人

結文酒之社晚夢一道士持陶靖節小像索題諦視之  
卽已也題云在晉爲淵明躬耕辭五斗昔以節自持今  
惟義自守千載復歸來春風吹五柳曾識白蓮人遠公  
是吾友蓋十八人中有白蓮道人如本也翌日復作偈  
言投筆而逝鄉之遺老至今傳之

姚亮字叔信秀水人有元岳山人詩集

叔信寄懷朱宗魯太醫云憶昔都城醉故人睽攜二十  
四迴春心隨明月長飛夢日斷停雲欲愴神藏室書成  
周柱史丹箴筆紀漢宮臣何時得副還山願芝草瑯玕

共采真此贈先少保作也少保保御三朝曾撰太醫院志定陵親政後醫或進以金石劑起居未安先公入視疾奏曰聖體病在肝腎宜寬平以養氣安靜以益精帝喜命大璫陸敬書之屏斯叔信詩有丹箴句也

王叔承初名光徹以字行更字承父晚更字子幻

吳江人有吳越遊閩遊楚遊嶽遊諸集

承父才情奔逸下筆不能自休其論詩不甚傾心王李大指謂事與景者天地所自有之物偶遇而收之情與意者吾所本有之物偶觸而發之彼吾役也吾不彼役



也斯言良是惜其所作牽率者什九王元美序之稱其句就而色自傅篇就而用恒有餘驟讀之恍然若新既諷之而又恍然若故王敬美序之稱其能以牛溲馬渤爲藥餌嘻笑怒罵爲文章蓋皆寓貶于褒之辭而承父自負其才受二美之籠絡不覺也平情而論承父亦安能敵元美卽就宮詞百首而觀已遠出元美之下特其卷帙繁富不減弇州詩部爾當嘉隆間布衣稱詩若沈嘉則王伯穀及承父三人咸以多勝人今歷年未久全集流傳日寡後世誰相知爲重刊其詩者豈惟重刊覽

其全集而不欠伸思卧者亦稀矣奚以多爲金陵豔曲  
云綠江天作塹翠嶺石爲城柳暗黃金塢花明白玉京  
春風十萬戶戶有啼鶯揚州歌云二十四橋邊當壚  
最可憐粧成窺客坐不耐數青錢東家女十三西家女  
十五夜半寒孃啼嫁與并州佑西湖雜興云看花須近  
寒食看潮待過中秋二月十五花信八月十八潮頭荆  
溪雜曲云賣殘竹菌筍還來收罷蘭花蕙又開但焙茶  
芽先穀雨不愁虎跡遍莓苔蜀山山下火開窯青竹生  
煙翠石銷笑問山娃燒酒杓砂坏可得似柳瓢竹枝詞

云白鹽出井火燒畚女子行商男作家槿布紅衫來換  
米滿頭都插杜鵑花

黃姬水字淳父長洲人省曾子有白下高素二集  
附錄王元美云黃淳父如北里名姬作酒糾才色既  
白可觀時出俊語送汪太學遊江都云千里王孫歸  
未能風雲意氣每超騰年來裘馬遨遊處不是金陵  
卽廣陵

王穉登字百穀一字伯固長洲人國子監生有晉  
陵金昌燕市客越青雀竹箭梅花什荆溪松壘

諸集

伯穀詩亦華整第嫌肉勝於骨至袁文榮所賞色借相  
公袍上紫書生薄命原同妾等句媚竈之詞近於卑田  
乞兒語矣錢氏甄錄太繁手刪其什九而風骨始刻露  
嘗鼎一臠未爲不知味也邊警云琵琶洲上香山澳來  
往初通海上艦漸習文書通漢語別居城郭慕中華餘  
甘却載西商舶吉貝先歸市令家島寇須防勾引漸斧  
柯莫待剪萌芽湖上梅花歌云山烟山雨白氤氳梅蕊  
梅花溼不分渾似高樓吹笛罷半隨流水半爲雲虎山

橋外水如烟  
雨暗湖昏不繫船  
此地人家無玉歷  
梅花開日是新年

梁辰魚字伯龍崑山人有遠遊橐

伯龍雅擅詞曲所撰江東白苧妙絕時人時邑人魏良輔能喉嚨音聲始變弋陽海鹽故調爲崑腔伯龍填浣紗記付之王元美詩所云吳閶白面冶游兒爭唱梁郎雪豔詞是已同時又有陸九疇鄭思笠包郎郎戴梅川輩更唱迭和清詞豔曲流播人間今已百年傳奇家曲別本弋陽子弟可以改調歌之惟浣紗不能固是詞家

老手詩律猶未細物能駢贍而已

林兆恩字谷子莆田人

林谷子李卓吾閩中二異端也題室一絕云茫茫天地  
一閒身寄跡榕州今幾春日暮潮平沙欲合隔江還有  
未歸人

袁景休字孟逸吳縣人

孟逸隱於卜肆歿後閩人林古度寫法水寺見孟逸夫  
婦停棺于寺傷其無子取摺疊扇畫兩棺貯破屋中上  
雨旁風極淒慘之狀題詩其上有新安客見而憫之出

私錢庀窳窳古度又口授遺詩刻之成集余購之不得  
繡谷蔣氏藏孟逸墨蹟五翻凡十絕句函錄三首孟逸  
夙見知於沈嘉則其送嘉則詩云道上霜寒連白鴈馬  
頭木落見黃河殊有爽氣宜其訕笑詆諆及劉子威侍  
御也入慧慶寺云新秋入古寺涼氣何清越樹杪夕陽  
微山蟬鳴不歇春日過南城云黃鳥當三月城南景正  
繁桃花千萬樹不異武陵源自江村望虎邱云茲山奇  
且麗迴與江村合幽人去復來斜陽在孤塔

靜志居詩話卷十四